

四庫全書

集部

欽定四庫全書

文忠集卷七十

平園續稿三十

宋周必大撰

神道碑十

同知樞密院事贈太師洪文安公遵神道碑嘉

泰三年

洪忠宣公見危授命半世異域白首來歸力陳忠言至計高宗方引以自近權佞惡其害已不使浹日安於朝

廷之上至以漠北僅存之身投諸南荒必死之地身且不闕遑恤其家然而長子丞相文惠公次子樞密文安公被遇兩朝先後得政又次子翰林公邁未及大用而入從出藩翱翔最久蓋立朝莫清於登瀛莫榮於代言莫重於掌文柄莫尊於間兩社公既與昆友迭居並以文章稱天下公又先進或一再至焉其後孫曾印綬相望方興而未艾衣冠盛事世推洪氏易云積善之家必
有餘慶傳謂非此其身在其子孫蓋天定能勝人也樞

密諱遵字景嚴世為饒州鄱陽人曾祖炳贈少保妣紀國夫人何氏祖彥先贈太師榮國公妣秦國夫人董氏考忠宣諱皓終徽猷閣直學士左朝散大夫贈太師冀國公妣楚國夫人沈氏次見文惠碑公兒時端默如成人楚國亡慟絕者再苦學忘晝夜詞章壯麗自成一家紹興十二年春以右承務郎監南京中徽廟冠詞科賜進士出身高宗念其父特除秘書省正字復科徑入館自公始閣下多前輩皆以畏友待公明年春文惠公繼來

搢紳榮之秦煇為祕郎為少監勢睨赫赫公守道安恬
留滯不遷九月忠宣去國公求通判守常州湯樞密鵬
舉部使者孫秘丞汝翼待僚吏嚴峻公雖少而明擿吏
姦臺府爭委以事移倅婺州守李琛傲愎亦知敬公升
佐紹興府未上十五年夏再入為正字攝行外制十一
月湯樞密執法殿中薦為御史方賜對而忠宣公薨服
闋召還公奏先臣龔璿均使北廷璿臣劉豫以擅殺人
被誅秦檜反贈節鉞臣父抗節乃貶死可謂不分逆順

矣詔還忠宣舊職賜謚擢公起居舍人遷郎兼權樞密
都承旨二十八年也明年正月除中書舍人賜服金紫
殿前裨將轉達轉防運使王綱團練使公言近制管軍
十年一遷二人尚未滿歲上喜曰步帥趙密去年求遷
詞臣謂密為節度使方九年逮今乃除太尉卿論二人
軍中自以為當也時勲臣子孫多歷臺省議者以為言
詔序遷至次對即久任內祠公奏侍從非磨勘此
序遷可乎三十年正月兼權禮部侍郎俄遷吏部選人

詣曾改秩子奪遲速一出吏手公隨事疏理吏不得肆
完顏亮將渝平中外以為憂沈介使回獨謂無它公請
密為邊備兼權吏部尚書舊制文武臣致仕任子許所
在州保奏或請必由本貫革欺弊公言宦游蜀廣或數
千里自有勅牒可驗詔仍舊法公既以近臣兼承密旨
邊防民隱每為上言二衙春夏牧馬夏旅城仰給蘓湖
秀三州適積水冒田有司預請倍輸夏麥以補芻粟北
人索絳陽郭小的安化劉孝泰等二百家公皆執不可

軍器利弊命公料簡公區別良窳衆謂熟於軍旅者未必能也上以是有大用意入翰林為學士曲銓如故明年御史論湯丞相思退章不下內批以大學士奉祀當直例作平詞諫官云云公連請去三省擬除敷文閣直學士上令進徽猷提舉江州太平興國宮閏三月平江闕守上親用公先是金主命張忠彥堅壁鳳翔拒吳璘以劉萼政擾襄漢自將精銳及簽軍分寇兩淮謂我悉兵扞邊乃別造舟膠西闕河北壯丁雜金人號大漢軍

統以蘓尚書者將由海道乘虛擣二浙謀知其謀詔浙西總管李寶率舟師禦之公竭資糧器械濟寶寶乘風盡焚其舟亮謀既壞忿蹀就薨寶由闕大夫超授靖

海軍節度使公有助焉步師李捧嘗請斷吳江橋防兵入或又欲塹常熟縣之福山限其騎軍公曰審爾是棄吳以西耶凡堂帖監司符令皆收不得上幸金陵從衛百須傍郡承迎不暇入公境獨無過求公謂官拘商船聚近海縣募水手留民兵夾運河築烽臺徒費無益悉

條奏散遣吳人德之三十二年夏上將內禪趣召公曰
詢來期遂還翰苑凡傳位及登極赦上太上尊號追冊
安穆皇后并封三王制詔皆公視草六月進學士承旨
兼侍讀隆興元年知禮部貢舉皇城邏卒挾內侍王允
脩侵辱士人公引蘓軾奏陳慥故事以聞閩士揖其友
邏者指為傅義欲掖出之公命卒業一士賦擅場又有
對策剴切皆傍犯名諱公為取旨許降等奏名前二人
林光朝樓鑰也陳自脩試詞科擬制一語聾牙被黜公

荐其才學特與教官其愛惜士類如此五月同知樞密院事張忠獻公以元樞督師江淮公與宰相協心幃幄凡處分機要平議對境書檄敷陳曲折率稱上意公前在從班與正言周操議論不同至是操為侍御史將以和戰不決彈公疏未入語漏上徙操權吏部侍郎公不自安求去上却其章請益力以端明殿學士再提舉興國宮還鄉傾貲葺園圃築小隱堂日與昆明賦詩飲酒極溪山之樂乾道六年起知信州民遇吉凶及營造因

於科酒諸縣重賦斂州市物虧其直公家隣郡素知之
至即亟為罷行旬日驛召赴闕奏事時江東圩田壞徙
公知太平州前政郎周御史聞公來不俟合符馳去追
餞十里曰前日國事何嫌今不為子孫契耶交懽而行
公躬履圩塿勸相徒役用工數萬人忘其勞轉運張松
妄奏圩未嘗決民無轉徙止當責成圩戶裁省催募公
乞朝臣按視於是將作監馬希言監察御史陳舉善繼
來直公之言圩成合四百五十有五松方別治溧水永

豐圩過料工費民都逞憾公曰郡當歲儉方振恤流移
勸分乞糴如割股不充喉尚能飽他人之腹乎力訴於
朝就除知建康府兼本道安撫司行宮留守上諭當制
舍人范成大載公治績且許入覲時虞丞相允文有意
北征先移駐侍衛馬軍驟增萬竈勅公同二府議於內
殿公奏呂惠卿請與弼臣同對神宗赫怒近太上在金
陵張浚司留鑰亦不許偕執政奏事願別班引上批所
委體大共議勿辭蓋近比所無也進資政殿學士寵其

行至則蠲苗米耗剩許民自持斛槩徧走郊野位置營壘民居及塚墓一無相涉諸將不能易上賜手札曰塞地異同卿挺身任責非乃心王室疇克爾踰年役興禁卒醉酒搖衆公磔於市帖帖無敢噪御前軍嘗晝入旗亭挺刃椎壚公付獄驛聞統帥懼罪乞付軍自治上怒罷統帥公亦貶秩二等項之還營乞工亟還元官加大學士屬部饑公瘞精採荒食少事多庸醫勸服礬石鼻衄不止暮夜江船火近大軍倉公馳掇疾益侵祠章三

上淳熙元年春乃許提舉臨安府洞霄宮十一月甲午
薨於里第享年五十有五積官大中大夫贈宣奉大夫
爵本縣開國子食邑六百戶四年正月丙午葬湖陽七
蟠山之原妻咸安郡夫人朱氏尚書右丞諤之孫朝議
大夫正剛山翰林狀公遺事上太常謚曰文安有文集
八十卷東陽志譜闕各十卷錢譜五卷男子三人稿今
為奉直大夫新知峽州樞早世擇今為奉議郎新兩浙
轉運司幹辦公事賜緋魚袋女六人四不及嫁其二適

禮部尚書木待問提轄左藏東西庫陳由義今俱亡孫
男七人价舊名恢今為奉議郎淮東常平司幹辦公事
悅承奉郎早亡佻通仕郎僖承奉郎佺伸倓未仕孫女
八人長適儒林郎新四川總領所幹辦公事余忠卿次
通直郎前知德化縣汪杲繼室以其妹次許進士楊景
受二天餘行魯孫男三人艾將仕郎蔚登仕郎著將仕
郎以二子升朝累贈太師咸安後公十二年十二月薨
與公同穴贈秦國夫人昔某試館職公實發策孝宗初

元分掌內外制每議事輒聯名相與至厚以是峽州遠
求墓道之碑惟公靜重通明平居言不輕發上前議論
纒纒語簡而理足雖以文進政術自高與物無競家無
餘資某既備書見聞復系以銘曰

劬躬燾後有開於先進德脩業惟嗣之賢嗟嗟忠宣奮
身致主生死朔南兩極艱苦天實恫之三子英英科名
宦達公則先鳴翔於樞庭底績三鎮有猷有為謂復得政
何德之臧而年勿長惟文與行沒世彌彰彼崇者立屹

立斯石詩以颺之有永無斁

和州防禦使贈少師趙公

伯驥

神道碑

嘉泰四年

太祖皇帝七世孫和州防禦使提舉佑神觀贈少師諱
伯驥字希遠系出燕懿王王生彰化節度使惟忠彰化
生宣城侯從謹號宣州位宣城生崇國孝秦公世恬崇
國生嘉國公令駿嘉國生左朝奉郎贈大中大夫子笈
公大中第四子母碩人劉氏毅肅公昌祚孫紹興初以
嘉國遺奏補承節郎監紹興府餘姚縣酒稅樞密韓公

肖胄以一代人物薦於朝歷監臨安府市舶務潮州商
稅臨安浙江稅高宗者米芾字芾嘗奉詔書誌銘真蹟
進御喜曰令駿及從蘓軾黃庭堅故子姪皆業儒朕在
宮邸知之召對待以家人禮錫帶賜第屢侍清燕改侍
衛司馬幹辦公事浙西安撫司幹官隆興二年擢本路
兵馬副都監兼職德壽宮進兵馬鈐轄乾道六年金國
遣耶律子敬張僅來賀會慶節假泉州觀察使知闔門
事充接送伴副使者聞公議論激昂甚加敬憚初孝宗

銳欲恢復用宿將李顯忠邵宏淵大舉北伐雖二將不
咸王師自潰然威靈所加中原多響應者敵由是委曲
求和上亦思蓄銳再舉姑從之當時敵求海泗我若求
鞏洛如鄭壁假許田於理為長況彼以太上為兄書儀
一用敵國歲幣復損十萬已計其大豈計受書細禮此
自謀臣欲速無遠慮之失也是夏上命起居舍人范成
大充泛使議二事金許遷奉徽宗及欽宗梓宮至於受
書亦無峻拒意尋遣中書舍人趙雄賀金主生日遜公

為副南渡宗室北使自公始十一月己巳某夜直玉堂
大璫霍汝弼出御札云生辰使兼賚國書一封理會受
書卿可擬進立具草付弼明言尊卑分定或校等威叔
姪情親豈嫌坐起上批付宰執商議二劄併得家藏後
四日召見褒諭云卿能道朕心中事因宣示成大所携
回書讀訖奏臣不知彼說陵寢豈可正及受書上謂難為
辭奏云容臣與宰執謀別作意度退至都堂而商議之批
已先下某添一聯云惟列聖久安之陵寢既難一旦而輒

遷則靖康未返之衣冠詎敢先期而獨請宰執難之七年正月雄等行壬辰宰執謂子對境果移文問二事悔不用君言予云幸雄未出境宜易國書而徵對境所問附賀生辰使副仍錄本付雄等毋如呂夷簡不使富弼知書意也諸大夫以為然奏遣密院使臣追及雄等於盱台敵自此始無說前公與雄陞辭上以賀書授雄別緘授公敵遣盧璣烏凌噶仲傑接伴知持禮特用宗室待遇加厚父老亦歎曰此我家天族也老嫗有流涕奉壺漿者至保州駙公率官屬望國初

先瑩御莊悽愴稽首人為動色公與璣輩在道誠意相孚璣問此行無他求否公及別緘璣必問盱台之檄喜公無隱亦頗通情嘗詰公南朝移司馬屯金陵似將遷都又濠州人夜劫靜安鎮馬殺死軍兵無乃求釁有諸乎先是盱台守龔蓋禁止騎兵作過人犯者必斬公携印榜示璣且謂渝盟不在移屯動觀聽璣等皆永釋暨入見雄與公各進國書入辭亦各授答書公再三奏從違其宣徽使敬嗣暉傳命云已載書中勞還上悅自武翼郎超

轉武翼大夫俄陞本路副總管公贊帥優支將士餐錢
精教閱明階級捕逃亡禁私役一日內教上謂驍勇不
減三衙褒諭帥守趙礪老礪老歸功於公持領榮州刺
史淳熙五年公子司農寺主簿師業輪對上曰卿父宗
英旦夕煩一出明日遣內侍問公浙西刑獄轉忠州團
練使時議分屯四明水軍於平江之許浦委公相視公
言汭浦泥沙膠舟利屯輕舸若戰艦當泊青龍鎮詔可
郭大用代於及為統帥欲毀民居夷丘墓繕營壘公請

市閒田公私便之蘓湖闕守公皆兼攝晝夜服勤庭無
留訟潔已裕民財用贍足江陰士人吳姓者罪當杖而
情可恕公緩之迄用赦原吳興元犯法公命教授答以學
規愛惜士類如此或得盜賊囊橐鋤治不少恕特轉武
功大夫和州防禦使以勤瘁得足疾七年冬師罷接伴
金國賀正者上令過平江為朕屬卿父謹疾自愛許送
伴回程少留八年天慶觀火焚正殿公籍黃冠私帑一
新之上賜筆金闕寥陽寶殿并親札賜萬緡助雅飾行

在闕尹上欲用公固辭詔令奏事留奉內祠九年正月
特落階官以正仕并提舉宮觀張燈宴客自歌所制樂
府酒罷欲寢無疾而逝十一日也訃聞兩宮軫悼賜秘
器以斂年五十九是歲三月三日葬平江府吳縣至德
鄉觀音山十一年師業用大禮恩乞易公文階換通議
大夫累贈至少師初娶楊氏廣西鹽幹革之女先二十
四年卒再娶劉氏昭懷皇后弟儀王安成曾孫後公十
七年卒皆自恭人累贈秦國齊國夫人並祔葬焉二子

師業以文采第進士才猷歷內外要劇嘗守臨安歷工
戶部二侍郎今以龍圖閣待制帥維揚師弇武經郎新
常州兵馬鈐轄五女長適訓武郎董珏迪功郎湖州烏
程縣主簿李秀實再寡次適故通直郎知江陰縣陳岫
又適武功大夫主管神祐觀張延裕次適文林郎新臨
安府觀察推官胡如祖次適故承節郎寄班祇候續湜
孫男三人希蒼承直郎建康府駐劄御前諸軍都統制
司書寫機宜文字希虞保義郎監潭州南嶽廟希祐文

林郎太平州蕪湖縣丞孫女二人長適從政郎監紹興
府諸暨縣中浦犒賞酒庫揚訓次適宣教郎知紹興府
嵯縣詹人民亡矣公風神警邁性識明敏束髮喪父毀
瘠過哀既娶與秦國事母孝敬兄沒撫孤姪過已子割
俸助嫂盖自大中繼登儒科仕止佐州篤意教子孫至
公博洽醞籍長於歌詩心盡取法晉唐助游戲於丹青
食客常滿座羅列書畫弓刀自娛而無聲色之奉踈財
重義欲種德遺後世家無餘資高宗知其居隱隘輟

地基於比隣仍給工役費以益之甫落成而師輩唱名
在丙科又摘御前聞喜宴詩大書榮桂榜其樓後數日
孝宗宣引獎其義方之訓兩朝宸章充滿篋笥士艷其
榮自號無隱居士有詩詞二十卷藏之家予久與公父
子同朝至是楊師按贈典子為侍從父極三少乃以族
人故中書舍人彥中所次行實請碑墓隧為之銘曰

唐興聖典姑臧攸自歷世惟七揆實賢裔人門第一蕃
首知貴洵美亞師有華帝系名聞幽燕厥亦北使僅登

扞防丕載高位顯允令子一品追隧勒銘昭之前脩是

繼

武泰軍節度使贈太尉鄭公興裔神道碑

嘉泰四年

顯肅皇后當徽廟太平極盛時正位中宮恭儉有容聞於天下族屬往往被服儒雅戚畹儀之高宗南渡諸后家多阨於兵惟顯肅之姪榮國端靖公諱藻舉宗扈蹕久領上閣以使相奉朝請考終於家公蓋其猶子也自以才敏結主知歷中外予長樞廷來承密旨聯事三年

見其議論正職業修又與予同生丙午以是其子持秘書丞龔頤正所狀行實求碑墓道誼不得辭鄭氏世家開封公初名興宗字光錫孝宗遜介北使賜名興裔曾祖諱紳太樂平郡王追王南陽謚僖靖妣秦國夫人李氏蜀國夫人任氏祖諱翼之陸海軍節度使贈太師魯國公謚榮恭妣宗女仁壽郡主父諱蕃武經大夫和州防禦使贈少師妣燕國夫人趙氏公早孤父事榮公紹興四年用顯肅遇明堂大禮恩補成忠郎監潭州南嶽

廟幹辦祇候庫昭慈聖顯皇后殯宮內外巡檢志在問
學留林下六年未嘗干進監鎮江府權貨務都茶場歷
秀州宣州平江府兵馬鈐轄隆興元年陞江東路鈐轄
乾道初留司治行宮望幸公謂勞人費財且都統及馬
軍行司擇帥未善孝宗由是簡注三年徙閩路入對詢
守令臧否公誦所聞上曰卿練達時務習知吏方行當
用卿會復置武臣提刑七年就使本路郡守與寓公因
詩文交訟獄久不決公平反之甌寧有殺人亡命者干

繫日衆公乞摘斷上喜遙頌高州刺史福帥常用大臣
監司例不可否獄事公獨舉其職制檢驗三格目一申
本司一上所屬一付被害之家參互考實遂著為令
四郡屢更鹽筴漕臣請易綱運為鈔法公極言其非又
謂荐舉不公選人宜參用考任縣尉捕盜改秩多偽當
加審覈海寇倏去忽來調兵常無及宜復置澳長寇至
徑率民兵禦之又言中禁兵事藝未精仍多私役漳州
野象害稼民設機穽而獲州縣追取其齒無敢捕者悉

條奏罷行之八年領成州團練使示旌褒也或傳敵有
異志召為生辰副使覘之使還具言無他提點浙東刑
獄淳熙元年易浙西鎮江軍習水戰貴近將命在焉大
風舟壞士溺詔公審視公以實聞有不樂者徙公江東
請祠歸九月除知闔門事兼幹辦城隍司十一月兼樞
密副都承旨接送賀正使者步軍營婦楊殺旁舍兒取
臂釧而棄其尸廷尉論如律刑部以無證佐出之詔公
與御史雜治得實上曰朕固知鄭某能辨此以其廉貧

特支真俸賜第百官宅仍給營造費公自初仕積十四
遷至武功大夫領和州防禦使四年特轉右武大夫四
月丁母憂六年免喪職任如故尋副館伴又充明堂大
禮行宮使八年落階官正除均州防禦使九年再使金
國遷潭州觀察使榮國薨公請間致追報之義提舉佑
神觀十三年起知揚州不拜明年帥盧歲儉力舉荒政
活饑民為多十五年復徙維揚適承贖乏樽節百方初
在淮西却隣道互送禮公至按籍有支無收前政俄坐

妄費編戶茅舍因大灾貸民萬餘緡陶瓦一新之復請
於朝免責其償楚州議改築舊城或云此韓世忠遺其
墓不可易上雅信公特命臨視闕地丈餘板幹堅密上
閱奏喜曰鄭某不吾欺也久之以餘力葺學校立先賢
祠定部轄民兵外差法作成士氣濟漕河治橋梁創義
塚細大畢舉光宗嘉之紹興初年特遷保靜軍承宣使
二年召領內祠充明堂大禮都大主管大內公事今上
即位四明調守公在選中兼沿海制置使蠲常賦撤私

稅闔境使之慶元五年告老制授武叅軍節度使中興後
轉節度使致仕如前執政葉夢得自觀文殿學士而換
劉貴妃父懋由兩使而遷止降外制至是時特宣麻蓋
異恩也爵自壽昌縣開國男食邑三百戶累封郡侯食
邑一千九百戶寔封二百戶方從容賜第築退庵以佚
老九月二十日以疾薨於正寢壽七十四特贈太尉公
天性孝謹燕國之喪幾至於毀榮公將終分以餘資公
辭曰叔父素恤宗族願立義莊贍南北眷至今賴之上

前論事隱孝嘗歎風俗苟且公曰陛下當治其本凡將
相大臣審擇而篤信之使安其職則苟且之習革矣上
以為然職事所及間荐人才未嘗使知平生寡嗜慾每
從榮公講論朝儀退語諸子喜誦白樂天詩取言行可
法者為聞見錄故其逝也九重震悼宰執暨文武朝士皆
賦哀挽舊治士民祭奠絡繹有司定謚曰忠肅娶林氏
同知樞密院事吳郡文節公希之孫贈碩人前公十八年
薨子男四人長挺闕 大夫忠州團練使新知揚州次

搆成忠郎早亡次損從事郎浙東茶鹽司幹辦公事次

闕

文林郎浙西茶鹽司幹辦公事女六人長適承事郎

前添差兩路轉運使催促物料官高大可次適承直郎

前知池州建德縣劉植次適武節郎太平州兵馬鈐轄

張莘次適奉議郎提轄權貨務都茶場王子瀾次為尼

賜號直戒大師次天孫男二人鑄保議郎早世次鐸承

忠郎閣門省班祗候孫女一人諸孤以是年十二月庚

午葬公臨安府餘杭縣石門山從少師之塋其銘曰

列聖法家高出前世姻戚多賢相率勉勵英英掌武其
美能濟進不以恩從政果藝張旻朔漠覘國無蔽攬纒
閩浙祥刑有惠導旨籌幄司儀班綴淮壩撫綏郵海節
制顯庸交奏宸指默契引年告歸旌節里第胡不百年
遽逐川逝咨爾後人引之勿替

文忠集卷七十

欽定四庫全書

文忠集卷七十一

平園續稿三十一

宋 周必大 撰

墓誌銘一

胡斗南

真

墓誌銘

紹興五年

紹興十三年高宗皇帝復置國學於行在所四方英俊
挾藝求試以萬計江西素號士鄉越明年中選者通一
路纔三人而友人胡斗南在焉自是或留肄業或歸省

親往來四十年聲譽日聞凡閩浙江湖先進若後生一
遊成均則知斗南姓名曰是脩身安分通經而贍於文
者爭願結交人謂釋褐可日月冀而連枉有司中間僅
一遇覃恩免舉一以詞賦獲舉迨升舍就試蜀人李賢
良庠考其第一御史揭榜復疑人數不應式罷去祭酒
司業博士正錄無不嗟惜之後值德壽慶八十恩乃授
迪功郎監潭州南嶽廟淳熙內禪循修職郎又數年而
沒其初終如此今夫學者不知進德脩業每考得失於

占筮一或連蹇非怨天則尤人惟吾斗南學成名立自鄉達於國皆曰當然乃獨不然嗚呼可以言命矣君諱箕字斗南其先自秣陵徙廬陵曾祖將仕郎諒祖鄉貢進士方中考宗古廬溪王先生庭珪嘗銘其墓君幼而志趣不羣既長貫穿經史尤精於春秋為文下筆數千言袞袞不休間得異書口誦手抄忘寢興已無倦事親篤孝免父喪積哀冠於墓次遇忌日及歲時必登塚而服之母太安人陳氏無恙時間歲自學謁告徒步數千

里不憚勞諸弟藉君教導皆有聞其季籍登第改秩不
幸早世君平生介潔廉方一飯不輕就一毫弗妄取服
用簡質居無惰容與人交謙恭誠信未嘗戲侮鄉隣有
不善惟恐其知胡氏大族叔父資政殿學士忠簡公帥
以嚴正羣從畏憚惟待君加禮君亦有聞必告忠簡公
每於廣坐褒稱之風勵其餘生七十有三年以紹熙五
年二月六日卒取曾氏安遠令嵩之女四子楷模格標
伯仲嘗同試春官楷仍再舉文尤高二女長適鄉貢進

士倪升卿一未行孫男四人黠燮闕峻女四人遺藁三十卷三傳會例三十卷孫吳子注解並藏於家諸子卜是年十一月丙申葬吉水縣中鵠鄉溪塘蕉坑之原以狀求銘予與君游久知君為深銘無愧辭銘曰

行著一鄉而能不施於邦文傳四方而利止賓於王惟德之彰惟子孫之昌嗟吾斗南庶幾不忘

宣義郎致仕賜金紫魚袋胡公昌齡墓誌銘慶元

元年

江西多名士吉為冠自吉言之廬陵胡氏為大族羣從百數多通經工文章守禮典靖州治中汾宣和己亥上舍釋褐循州錄事叅軍剔中甲辰進士第高廟龍飛策士於淮海忠簡公以直言擢殊科益宏厥家其後大理寺主簿鎬知蒲圻縣籍相繼登第秋舉殆無虛榜它姓莫敢爭衡公於忠簡雖從姪而年相邇同事蕭先生楚學春秋俱號高第自公之祖已貢於鄉公當弱冠侍其父赴大比試父升而公黜公喜曰吾固不欲父子同荐

妨他人自是才名章章人謂一第可唾手取迨年四十始上春官又二十五年當乾道己丑乃以特奏名對策萬餘言唱名入高第初補將仕郎類試中選授迪功郎靜江府司戶叅軍帥守張敬夫儒宗吏師不輕許可咨公以府事潔廉正平闔府稱美滿一歲謝去敬夫曰君精力尚壯何去之果公曰某昔銳意亢宗今蹉跎至此姑欲應京秩格為門戶計耳敬夫不能奪賦詩餞之改承務郎致仕時淳熙四年也壹值德壽宮慶壽恩十

年賜緋衣銀魚十三年轉承事郎賜服金紫壽皇內
禪轉宣義郎蓋家居優游者十有六年紹熙三年十月
二十七日以疾卒享年八十八明年九月壬午葬縣之
儒行鄉仙壇嶺母塋之側治命也公諱昌齡字長彥曾
大夫諒將仕郎娶臧氏大父方中娶歐陽氏父仔母羅
氏生公九年而沒遺言勉公學公泣而志之終身篤事
繼母劉氏解氏俱盡孝解先適黃氏有女嫁公從弟生
子棟而寡公收恤教育使有成立紹興己卯慈寧慶典

解封孺人創佚老堂忠簡公為之記家故貧銖積寸累
不憚苦節獨於賓祭致厚族姻不能自存者周急無少
靳自幼至老學日益富每著書援證古今是是非非
不休喜藏異書手自讐校有文集五十卷娶朱氏先一
年卒四子長椿李根早世曰柢曰栒四女存者亦兩人
張沆劉之瀟其婿也孫男曰炎嬭女許歸歐陽瑩余與
公游久矣姪繹實娶公仲女不幸偕亡而公念舊弗替
年過八十猶歲以詩遺余大篇小楷少年者自謂不及

公今已矣柢來請銘其可辭銘曰

孝於親及宗姻儉於身豐祭賓少而篤學老益勤仕焉
遽止晚力榮初終誰毀譽則聞謂銘不信諏鄉評

宋故連州彭史君

堯輔

墓誌銘

慶元三年三月

慶元元年冬連州史君彭道夫以病卧家士大夫問訊
者輒擊袂屬惟恐其不亟瘡也十二月二十八日竟不
起疾於是吊客數倍於前識與不識皆咨嗟太息以謂
道夫謹飭而和明敏而恕宜光顯於世乃止二千石宜

至於耄耄乃五十九而止是命不副才仁不畀壽也葬
有日道夫之弟堯弼泣而請曰始叔公南安公未有子
嘗子堯弼叔父有子乃歸賴吾兄教育成立且盡推祖
產與我今無以報矣願聲之銘詩以著厥美子聞書曰
惟孝友於兄弟施於有政士大夫所以愛重道夫抑有
由也則叙而銘之彭氏世家吉州之廬陵道夫諱堯輔
曾祖皇任朝奉郎贈左正議大夫諱衍妣碩人蕭氏祖
皇任右朝請大夫尚書戶部郎中總領湖廣江西京西

財賦贈金紫光祿大夫諱合妣文安郡夫人黃氏通議
夫人李氏太寧郡夫人曾氏靳春郡夫人黃氏父皇任
右迪功郎南雄州保昌縣主簿贈奉直大夫諱楚老妣
恭人劉氏道夫以戶部致仕恩補將仕郎隆興二年試
文冠南銓擬右迪功郎柳州馬平尉簿桂帥中書張舍
人孝祥數委以事每稱其能去為靜江府司理叅軍用
舉員陞從政郎淳熙元年移贛州錄事叅軍獄囚危有
志罪不當死鄰郡貢士黎實為仇家誣以當死提點刑

獄皆欲殺之至盛怒臨道夫道夫堅持不可卒直其枉
官軍捕茶寇間俘平民道夫悉平反之它不以權執移
不為囑託私者尚十餘事薦章交上四年改宣教郎七
年知贛之石城縣踰歲為部使者以私意劾免時留丞
相作州誦言非辜使者尋悔悟謝它日言官亦以是擿
其過道夫遂起知江陵府枝江縣縣在水中央歲罹巨
浸乃用工二十四萬大為隄防水不能齧又以招糴易
和糴境帖帖則葺縣庠教養生員仍即三鄉各立小學

士民歌舞之十五年賜緋衣銀魚紹熙元年通判興國軍舊科黃河埽岸衣絹其後均之正稅足錢六千五百道夫力言於本路轉運林湜為裁其數足準五千而以漕計代輸其餘人兩賢之綱馬道出屬邑之永興敷芻糧擾甚道夫請括逃田充其費大治縣三山產鐵為私鑄窟穴姦盜雲集道夫請調江州軍二百人駐漳源契口遂解散四年造朝留丞相適當國進擬道夫知連州陞辭論天下平治日少願毋玩目前之安因及枝江義

勇差役興國私鑄上皆嘉納積官至朝散大夫妻宜人
黃氏先十年卒三男岳迪功郎新監潭州衡山縣戶部
贍軍酒庫呂當以蔭補官尚幼三女長遠從事郎表
州司理叅軍康夔之次適脩職郎新彬州桂陽縣主簿
董九成季未行孫徵女一其葬用二年三月丁酉地在
本縣高澤鄉義秀山之原初道夫之生戶部赴召道夢
神人以得孫戶部異之五歲能讀書十五喪父哀毀如
成人事大父諸叔孝敬盡禮踰冠入仕已能持心近厚

及臨事則毅然有守未嘗苟且故所至多可紀藏書數千卷集前言往行以為軌範善與人交尤尚義周急故居鄉無間言銘曰

五常之教兄友在中或閱于牆惟貨之從怡怡道夫幼孤匪闕仲也來歸先疇畢後才能禮多念茲則那鄉評喟然以勸其他

京西轉運判官方君

松鄉墓誌銘 慶元二年

故人林枏子方才高而守正吏事號強明其守信州稱

上饒宰方君季申不容口時淳熙丙申歲也子方嚴於
取人予常紀之後十五年奉祠歸廬陵季申適來守見
其決事如流往往飭以儒雅庭無留訟刑罰日清凡未
運力勝皆罷其美歲省本邑月解錢數萬緡大蠲積逋
以寬民力而用自足郡庠故存歐陽文忠公祠它無所
問君即後圃創六一堂繪像以事其先壟在屬邑瀧岡
下令尉捐俸葺之又袁公翰墨及集古跋真蹟刻示四
方皆前人未嘗及者君去後開三守人人為子言凡疑

獄滯訟經方君剖決者一字不可易其政如此子每誦
言子方知人今豫章牧右文殿脩撰蔡公戡狀君遺事
且道其子之意屬予以銘其何可辭君諱崧卿季申字
也九世祖自光州固始縣徙家興化軍族系日繁曾祖
早祖淵皆不仕父憲文林郎南息州陽江縣令後贈朝
議大夫陽江卒七月而君生稍長能自力於學登隆興
癸未進士第試教官中之以左廸功郎為紹興府學教
授未赴丁所生母張宜人憂乾道丙戌起家湖廣總領

所幹辦公事秩滿陞從事郎賞循文林郎添差淮西安撫司準備差遣會省員徙兩浙路轉運司屬官積營造功循直郎用薦者改奉議郎知上饒縣初葉丞相顯著治縣法一編世服其能君其婿也能遵行之縣凡七十二都保正副百四十人君令旬分四番番三十五人送詣縣受約束皆給闕歷有故追呼批歷授之無則奉歷而退人既不勞事亦隨舉保長則揭示當輸之戶及其數五日一集出納明白上下簡便先是督鄉司具民

之物力高下毋敢不實封文書案問遇當役者爭承則
啟封參考親加詰問情偽得人欣然就役常平使者潘
時以名聞召赴都堂審察通判明州壬寅秋旱守委
三倅分行六邑荒政君主奉化象山獨無饑民定海縣
鳳浦沈寔二湖久為浮屠氏擅其利民失灌溉君適被
朝命一切正之乙巳春選知無為軍未上改南安軍肇
新貢院條教簡嚴郡人祠君於學積官朝請郎會康壽
皇帝登極轉朝奉大夫諸司奏減最入對論監司當隨

所見按吏今乃牽引它司文章以為驗不幸出於私寃
何自伸願禁其然上嘉納焉紹熙元年春除知吉州
以大治用招軍賞特遷一官二年擢廣東路提點刑獄
三年從廣西轉運判官君大講鹽筴會計更法之病諸
郡實貨若干漕司歲得若干畫十二條上之且曰本路
民困矣乃椎剝以餉武昌又助靖州是謂瘠已以肥人
請裁其數躬冒炎瘴徧行象橫欽廉鬱林闕
州諏詢其利病將復告於朝會得渴病求奉祠朝廷閔

柳等

其勞以京西風土高爽易漕優之四年秋道長沙子適
在焉留語累日君以渴為憂明年三月二十五日竟不
起享年六十積官朝請大夫歸莫本軍瀨溪祖居之東
原蓋慶元三年正月壬午也妻葉氏封宜人二子直孺
信孺皆闕

仕郎君風神警邁議論過人才具恢宏善

治盤錯他人劫劫已常休休至於薄物細故皆經理有
法度博觀載籍因流沂源不極其本弗措也築最書堂
聚書四萬卷手自讐校尤喜韓昌黎文為舉止十卷附

錄五卷晚別成箋校十卷奧篇隱帙搜求殆徧時時發
明韓公為文之本意非但志其所出而已在南安績橫
浦集至京西補襄陽志正論謬甚多詩文辯麗略無陳
言二子類為家集二十卷嗟乎以君之才使仕於朝掌
邦計條使牒無不可者而用沅郡國粗試所長迄無以
大顯於世是可惜已為之銘曰

游夏淵源由求果藝古難兼之况乃後世彬彬季申少
自刻勵兩邦三路有政有惠宜登史闡宜贊邦計未殫

所長胡疾而逝吉民去思永矢弗替寫諸銘章以表幽
窆

宗室澹然居士

公衡

墓誌銘

慶元二年


唐虞成周同以睦族治天下而禮樂之教為急卿士多
世胄國家賴之由漢迄唐雖存屬籍遠則無紀祿亦弗
及信厚微矣本朝聚宗族於京師優給俸稍冠昏喪祭
皆為之節人人自重不見過失分派聯名萬葉可考如
是百餘年至於裕陵世繫蕃衍始擇才者出而用之未

仕不間戚疏計口給廩內則治以宗官外則掌以尊屬
今又百餘年賢才日衆仕官徧天下視尚書周禮所載
或過之無不及者尚何有於漢唐惟魏悼王魯孫安化
軍節度使高密侯克整其配曰普寧郡夫人王氏側室
曰馮氏後封真寧郡太君是生金紫光祿大夫叔暄娶
建安郡夫人張氏生成忠郎監潭州南嶽緒之有子曰
公衡字平仲母孺人張氏所生母金氏靖康之亂舉族
南渡日益貧窶南嶽府君抱病九江君年十五徒步迎

醫數百里外府君竟不起既葬無以自給乃奉張夫人
依諸父於豫章進賢縣食孤遺俸母子相與為命者數
十年夫人七十九而終君居喪盡禮內行彌飭邑官皆
來致敬君杜門不妄交惟聞人急難不以蚤暮赴之里
有疾疫倡率豪右躬為療治篤厚誠信見謂可托生死
少喜黃老不事科舉泛觀經史百氏手不釋卷壽康皇
帝登極補承信郎今上覃恩轉承節郎命下嘆曰君息
不敢辭毋以干祿可也自號澹然居士作山居詩見志

慶元二年夏疾作推五行曰吾死矣戒家事甚悉四月
丁卯誦有生必有死早終非命促之句端坐而逝享年
五十有九娶周氏鄉先生丕遠女山房李氏之甥年三
十九前君二十年卒四男彥演從政郎常德府司法叅
軍彥璋文林郎福建路轉運使主管帳司彥法脩職郎
吉州司戶叅軍彥沃未命一女適傅儔孫四人種夫稅
夫括夫權夫孫女二皆幼諸子以是歲七月丁酉葬君
縣南十五里歸仁鄉麻山之原夫人祔焉使來乞銘予

聞君夫婦奮躬艱勤一意教子其所從師慕君賢行樂
為訓導不問束脩有無而彥演彥璋彥法亦通敏好學
師逸功倍遂同登淳熙丁未進士第子官湖南彥演彥
璋皆嘗為僚迨歸廬陵彥法奉君官舍以是熟知其賢
乃為推國家教養之法公族之盛然後銘君之美焉銘
曰
其襟彬彬其緼振振事親愛而欽接物和而仁維德之
成維任之屯維年之不羸維子孫之興



文忠集卷七十一

欽定四庫全書

集部

文忠集卷七十二至五

詳校官原吉臣李傅熊

主事臣呂雲棟覆勘

總校官進士臣楊懋珩

校對官學正臣李巖

謄錄監生臣黃嵩齡

欽定四庫全書

文忠集卷七十二

平園續稿三十二

宋 周必大 撰

墓誌銘二

廣南提學市舶江公

文叔

墓誌銘

慶元二年

紹興甲寅五月戊辰前提舉廣南路市舶江君文叔卒於家次年正月壬寅歸窆其子實等以尚書郎黃君所狀行實來請銘昔君侍父尉贛之寧都與子兄弟傾蓋

如故自是熟君文行閱四十年情誼日親而君介弟立叔再婿予家銘君宜也君初諱登字清鄉後改今名上世洛陽人十一代祖承清為福州福清令因家侯官縣曾祖閏祖先俱不仕父詢真與叔父達同貢京師達登宣和六年進士第詢真特奏名入官終脩職郎南安軍南康縣丞累贈奉直大夫母恭人葉氏紹興甲子兼科取士君年十七以春秋舉於鄉其後連薦丁丑春遂中甲科補左迪功郎以父承南康調南雄州州學教授丁

內外艱徒步護柩一千里人稱其孝服闋為靜江府教授大新學舍增市田五百畝生徒雲集帥張孝祥雅重君去鎮日餞客端座酒闌索贈言相規君曰舍人文章政事獨步一世加以持重則大用矣僚友愕然張不懌而起明日召君握手曰始聞君言實不能堪久之方悟平生失處正坐是耳因共載累日留詩為別用舉主陞左從事郎移鬱林州教授鄰境兵將忿爭走訴外臺提兵假道縱部曲掠奪州人奔避君諭以禍福迄不敢肆

郡有冤獄理掾不肯言君白其冤部刺史二千石京削
交上改宣教郎復充沅州州教授秩滿通判建寧府監
淳熙十年解試刻革宿弊迄今以為法屬邑運鹽取贏
佐州用舊政吝本錢不予郡邑交病君多方為之於是兩
濟太守鄭尚書丙政尚嚴君贊以寬纒入閔月避親易
通判泉州兼南外宗正丞賜緋衣銀魚前守移疾政多
底滯君攝事決遣如流闔郡翕然大商王元懋因抽解
例輸白金君峻却之今資政殿大學士黃公治於鄉人

不輕許可時為叅知政事數誦言君之賢十三年擢使
南海越明年視事舊例船舟溺風濤者抑子孫續其業
人以為苦君首列於朝詔刊其籍船貨亦通課以最聞
在官三歲未嘗私市一物被疾求主管建寧府武夷山
冲佑觀積官朝奉大夫享年六十有七其塋在本縣白
沙之前坡原妻宜人黃氏同郡保義郎鏞之女二子公
實迪功郎南安軍司戶叅軍公宜將仕郎皆嘗試禮部
愿恪有父風三女長適進士陳公球次適承直郎監建

寧府合同茶場陳峨季未行孫男四人昌孫子孫廣孫
繼孫女三人君清明溫粹濟以諒直少從鄉先生問學
傑然出於衆既仕益自刻勵聲譽昭晰平居未嘗失色
於人臨事則志不可奪每誦馬少游鄉里目為善人之
言終身行之故其蒞官居家各無玷闕友愛立叔琢磨
甚至亦登科甲前君四年卒銘曰

瑟彼璠璣琢為圭璋不薦清廟而使炎方飲其光輝黃
壤悠伏更千百年尚潤山木

譚宣義孚先墓誌銘

慶元二年

廬陵郡統縣八永新為大西界湖湘壤沃地偏民生自足間遇水旱疾疫凡邑之大家分任賑恤之事某家發廩某家給薪芻某家藥病者某家瘞死者以是流殍稀鮮縣官推勛分賞必首及之君子喜其近古惟譚氏儒術起家好善樂施至宣義君復合前四美終身行之故人以為難去年春疾卒於家丐行狀於煥章閣待制誠齋楊公而謁予以銘昔我先太師秦國公暨我伯父金

紫光祿大夫與君伯父朝奉郎贈中大夫諱觀光同登
政和八年進士第世契之故義不得辭然誠齋之文美
矣盡矣不可以有加矣姑第其家世始末如左君諱孚
光字信仲世居永新曾祖諱華不仕妣太孺人父氏祖
諱傑累舉入官終承事郎賜緋魚袋贈朝奉郎妣安
人龍氏尹氏其長子中大夫也次子諱觀復實君之父
妣尹氏君孝以事親仁於恤下勤於學而勇於義尤切
切教子曰煥曰潤繼賓於王淳熙癸卯年該長樂慶壽

恩封承務郎自是十年間歷值三朝大慶四遷為宣義
郎賜服朱銀纂榮壽堂日與親賓燕樂侈上之賜士大
夫爭詠歌之其卒實慶元改元三月壬子也享年八十有
八娶林氏成忠郎高之女封安人賜冠帔五子煥今為
從事郎襄陽府司法叅軍將渾溥源並力學四女王揚
烈張澄顏世忠張湘婿也孫男三人康叔同叔正叔女
四人同叔名在南宮不幸早世煥等卜以二年十一月
丙申莫君縣之思賢鄉蘆峰之原銘曰

起家固難保之尤難積善有慶其居也安不虧於功不替於義以昭令名亦詔來裔

彭元亨墓誌銘

慶元二年

慶元改元正月辛亥安福彭君以疾不起卜明年十二月庚申葬縣南十里某鄉某原前兩月其子經哀經踵門出左司員外郎李君兼書一通及大學博士湯君璿所狀行實以銘為請為左司之言曰淳熙乙巳某尉安福聞彭君樂易信於鄉里會歲大侵郡督勸分君產中

下首發廩為倡乃克有濟某以是嘉其人授以著作呂君祖謙辨志編蓋自洒掃應對推已應物細行之矜達於全德凡前言往行次第畢載彭君受而服膺焉傳之副墨又求名儒達官敷繹之蚤夜力行不敢少怠尚善如力耕避惡如遠臭嗇於自奉豐於周急年六十三以沒其身動無過舉願有以表其窳予惟左司介而誠博士賢而文皆可取信宜為之銘君諱元亨字文昌其先自九江徙居吉州之安福縣曾祖朝祖承裕父知徵

勤儉好施邑人以長者稱之君世其業性尤孝謹父疾篤禱於神乞捐已壽以益親父尋愈事嫠姑如事母家庭熙然待制楊公萬里榜其書樓曰春風興以新詩工部謝尚書諤亦賦焉平生著述盈篋今彙次藏於家娶同郡歐陽氏前三年没子男四人經顯綱繼女三人鄉貢進士歐陽成務列宗歐陽好仁其婿也孫男七人龜年耆年康年保年益年彌年壽年孫女七人嗟乎秉彝好德誰無是心惟能欣慕師之有淵原推廣其所未至斯

足為一鄉之善士矣君之可銘不在茲乎銘曰

噫彭君信所聞善可為老則勤生無玷沒有名永其傳
在斯文

朝請郎曾君

光祖

墓誌銘

慶元三年

君姓曾氏諱光祖字景山一字承先五世祖宗自南豐
徙居吉州安福縣曾祖弼祖序昌皆積善父嘉謨博洽
強記仕至從事郎衡州常寧尉累贈朝請郎君其長子
也穎悟力學四舉禮部淳熙乙未歲登第以迪功郎主潭

州善化簿未上丁父憂再主道州江華簿見謂通敏攝
永明令用舉者陞從政郎移徽州錄事叅軍決讞精明
寃伸誣伏郡守薦於朝監司亦薦之由承直郎改奉議
郎堂選知臨江軍新喻縣當孔道前令往往罪去君
政事日脩新庠序以勸士築陂塘以飭農民訟至庭曉
以義理凡無賴屠沽鬪毆則以法繩之百里大治紹熙
末採時事為十箴名之曰徇路別為序篇數百言詞甚
剴切獻之執政期有補乎國家要路多知己欲拔之朝

君志在便親調通判袁州垂赴而卒慶元三年正月六日也享年六十有四積官朝請郎賜緋魚袋先娶同邑王公衡之女贈安人再娶從事郎韶州樂昌令胡日新女封安人一男鄉貢進士傑二女長適進士王闕早世次適迪功郎新隆興府新建令尉趙師德孫男三人士遜士遵士逾女六人長適劉鑑餘未行曾孫宜壽卜以十一月辛酉葬縣南永嘉鄉九岡之原君孝於事親仁於念舊揚人之善掩其過失為使所至有能名平居喜

著述有禮記精義十五卷治功必致錄十五卷江湖詩
集十五卷南溪舊稿二十卷長孫遜以君與子厚踵門
求銘於是君母太恭人李氏年八十五矣自君升朝繼
逢慶典冠帔絲綸寵章交煥歲時二子率諸婦奉觴上
壽曾孫滿前坐閱五世而君之子僕名在貢籍儒風濟
濟今相國京公大書壽衍二字以揭所居之堂名士咸
為賦詩鄉人榮之慕之居無何僕死君戚戚秉以微恙
尤自力娛嬉親傍比其將沒母子相持泣下鄉人復聞

而悲之夫憂喜聚門物理果然幸君世祿延於士遜它
日昆弟能自植立不隕先業振其家聲以慰曾祖祖母
之心以成父祖之志是又鄉人之望也歟銘曰

嗟乎景山名官方興匪朝之儀惟親是寧耄期在堂五
世其盛胡嗇君壽以悲易慶有崇彼岡宅兆中存既固
且安利其孫曾

叅議董君

昌裔

墓誌銘

慶元五年

君姓董氏諱昌裔字夢貺廬陵郡著姓儒風郁然登

科者相繼仁宗景祐元年放進士五百人郡之中選者十有一而董氏曰洙與其子師德弟汀姪師道儀一門五人在焉洙父子咸同丙科太守江鈞奏所居為五桂鄉邦人榮之儀仕至都堂郎中嘗歷部使者贈左正議大夫即君曾祖也祖乾粹又登嘉祐八年進士第仕至左朝奉大夫贈中奉大夫父彭右朝散郎知鬱林州贈通議大夫君自少力學試郡庠率占上游宣和四年父告老補將仕郎靖康間丁外艱服闋以迪功郎尉台之

臨海母憂免再調柳州司戶叅軍攝永興令蠻僞犯省
地君發丁壯授方畧扞禦境工民以奠枕移連州錄事
叅軍二千石苛急恚君守法屢窘以事君不為屈或誣
良民為盜君平反之俄獲真盜新守王大寶及外臺交
薦改宣教郎為臨安府錢唐丞遷闕命君行其事赤縣
繁劇不勞而辦顯謨閣直學士劉公才郡薦君宜在臺
閣添差通判婺州會省員罷入攝行都酒官連被最賞
出為湖南轉運使主簿文字李全作亂王師四絕糧餉

不乏幕畫為多故叅知政事魏公良臣帥長沙以名聞
隆興元年擢知興國軍宗室犯法君繩治不少恕調辭
詆誣有詔禁錮善良安馬地介江湖田疇下下非潦即
旱君祈禱立應大修學校增給生徒時號循吏以年高
丐閒得浙東安撫司叅議官秩滿求便鄉改江西以歸
積官朝奉大夫賜服金紫妻宜人林氏吏部侍郎保之
女治家有法內外肅然年六十八淳熙丁酉十二月乙
酉卒後三年歲在庚子正月甲戌君亦卒於家享年七

十八合葬州西萬松江一子文林郎新監行在車輅院
冲元五女長適迪功郎宜州宜山縣尉高筠次適朝議
大夫江淮荆浙閩廣等路都大提點坑冶鑄錢林祖洽
次適從政郎全州司法叅軍方珪次適朝奉郎通判潭
州郭贊次適朝散郎通判衡州斛僖孫男將仕郎塾女
一人自君之沒其仲女適林氏者日奉君姑從夫宦游
深念父母之葬有闕又惟泉水之義重於歸寧數諭其
弟謀改卜不事薰澤不御酒肉飯蔬飲水越二十年姑

亡終制遣提點君按行所部遂得偕來畢精竭力遷奉
雙柩葬撫州樂安縣雲蓋鄉西務之原實慶元五年九
月壬寅也雲蓋初屬吉水縣至和元年析隸永豐紹興
二十一年復割五鄉置安樂而雲在中至是始祔董氏
先壠以成親志義貫幽顯聞者歎息或至泣下昔唐傳
列女首以孝為先而所記節義率繫其若孝於親者僅
得二李氏其一父殯於堂十一年朝夕臨哀不嫁以養
母母死身庀葬具其一劫徙它州聞父亡間道奔喪至

則已葬力請開墓去棺塵其母病篤終日不視匕箸
朝加旌表史亦稱美由今觀之既曰內夫家外父母家矣
而苦節不匱兩致其義則視昔為尤難亦賢矣哉夫惟
有女如此父母之賢抑可知已况君中坦外莊訥於言
而敏於行居家有譽無疵蒞官奉公履正鄉人戶知之
予亦深知之冲元及提點君以銘見屬乃為銘曰

君稱善人仕則循吏學緒先業祿延後嗣生也能然庶
幾無愧有女而孝言歸故鄉宅兆既安子孫其昌沒也

雖久庶幾不亡

高州趙史君介墓誌銘 慶元五年

慶元四年六月乙酉高涼趙史君卒官其子實護柩數千里還吉州之舊居卜以五年十一月丁酉葬廬陵縣

闕

儒鄉三合平之原泣叙治命謁銘於予予不忍辭君

諱介字節夫鳳翔府寶雞縣西平原人曾祖義作坊使贈左千牛衛大將軍祖華武畧大夫贈成州團練使父持武經大夫知橫州贈武功大夫君偉岸磊落通經史

有智畧初為武畧外舍生其父坐法免官君忘寒暑甘
典憲伏闕叫閤投牒臺省移書要路力訴寃狀如是累
年卒洗丹書終二千石士論多之紹興三十二年用父
蔭補承信郎程試絕倫調鼎州桃源縣巡檢終更尉贛
之寧都未上召試闔門舍人淳熙二年也初孝宗置此
官視文臣館職對策舍入院而後除日朝殿階察臣僚
不如儀者大宴則與閣門使已下更互立御前最為親
切滿四考即與郡而君在選中金使來賀正旦假廉車

充館伴副使六年以例出知道州改彬州頃之去郡孝
宗詔以舊物起君後省格不下奉祠十五年歷主管毫
州明道宮台州崇道觀日與賓客賦詩飲酒奕碁博古
通今議論纚纚凡釋老諸書至稗官小說無不成誦聽
者忘倦郡守每以上客禮之甲辰夏守與戎鈐不咸軍
政頗隳一日其徒乘醉贅聚相歐已而曹逃驚擾市人
君與子兄子中杖策造營開諭禍福皆帖帖聽命諸司
以議賞或沮之而止起知高州至則次子亡從者亦病

瘁君哭泣憂傷視事二月而沒享年七十有四積官武
經郎先娶潘氏朝奉郎通判道州森之女再娶朱氏朝
請郎知新州琚之女俱封安人三男長即實也今為忠
翊郎嘗任袁州萍鄉縣稅官次宋乃前死者曰容亦死
二女適高子訖皆將仕郎孫珙珣珙當以君致仕恩入
官闕
女尚幼君早自植立既直父冤經理家事不
以累親心擇命士嫁二妹又恤其後諸姪婚宦俱賴之
有詩文十卷藏於家銘曰

赤也可與客言由也使治千乘羌小試其才能審交違於力命朝方還而蹟收符再剖而身病尚脩名之永垂寧宿草之俱盡

通判彭君

商老

墓誌銘

慶元五年

故尚書郎彭公以德原通才歷郡守部使者總領湖廣江西京西財賦凡其所至專以愛人利物為心號名臣諸子習熟義方聲聞交著君諱商老字仲伊生於丁未卒於己未葬有日其季轉運君漢老以朝散郎新通判

永州張煥鄉狀來請銘噫予既冠獲升總領之堂仲伊
少予一歲相善也越五十年情誼加厚究其死矣尚忍
銘之按彭氏世為吉州廬陵人曾祖諱士忠贈朝請郎
妣安人蕭氏祖諱衍進士起家終朝奉郎開封府錄贈
正議大夫妣碩人蕭氏總領諱合仕雖寢顯而官止朝
請大夫夫人謂不極於用累贈特進妣永寧郡夫人劉氏同安
郡夫人李氏新定郡夫人曾氏武陵郡夫人黃氏闕
新定出也莊敬自重質直好義力學喜為文熟毛氏詩

漢書文選紹興己巳郊

關

陰將仕郎重去親側兩以

迪功郎監潭州南嶽廟外艱既除乾道丙戌始為撫州

崇仁縣主簿異時文書匿吏家恣為姦利君拘之聽事

勾稽惟謹賦稅始正去南雄州司理叅軍有江澈者掠

賈歐陽若弼五歲子及其所生事發不承折米庫巡防

卒以它事遁曲吏乘勢盜用錢百緡逮治無辜李唐卿

失白金惑於左道歸罪其子三事積歲獄不決君立正

之上官交薦淳熙己亥宣教郎知辰州沅陵縣始至帑

庾赤立常賦或隱或逃催科無所指君推見弊原訓戒
丁寧民信服樂輸糧留縣周舉以送州又藏餘力於民
先是城寨有名無兵蠻獠數犯省地人被殺傷例償骨
價錢君招補闕額時其衣糧勉以武藝邊境遂安調湖
廣等路總賦所幹辦公事分治九江紹熙甲寅通判南
安軍奉法循理務舉其職郡縣吏有罪監司委君究一
切裁以正強有力者不悅嗾妄人誣訴云云君弗恤也
請吏窮究主管台州崇道觀內外臺猶入前謾嘗下其事

考實君素守家法臨政平允持已廉清迄無毫髮可文
致者平生恬於進取滿輒詣銓部注擬年勞賜服緋魚
積階朝奉大夫再奉忠祠終焉少時疾或授導引法晝
夜行之朱顏綠鬢老而不衰故其逝也以徵恙實慶元
五年九月癸巳窆用十二月庚午地在縣郭游塘之原
娶臨江軍甲族何氏封宜人堯仁子將仕郎孫男女各
一人銘曰

處躬德義承其家服采郡邑振厥華溫溫珮玉音不瑕

皎皎絲繩直無邪安於六品求弗奢雖未百年壽亦遐
善始令終衆所嘉展如之人尚何嗟

邵陽郡丞周府君因墓誌銘

高宗皇帝紹興二十一年放進士八榜矣里中同升四
人曰孟覺彥瞻辰告及予也彥瞻許氏諱世將老於學
辰告劉氏諱令猷敏於文予碌碌綴其間惟孟覺行誼
高一鄉於書無不通於文無不能喜推五行自期頗遠
暨唱第集英殿果褒然在前列人僉謂它日橫翔要路

無疑君亦日夜刻勵將有為於斯世而僅近佐遠州又不及工士大夫咸惜其天爵孔脩而人爵之不從也況予同宗同郡同年之情尤嗟惜其子以工部尚書謝公諤所狀行實來請銘今既二十年彥瞻辰告前卒公宅兆亦改卜乃克為之重可嗟矣孟覺諱因姓周氏吉州安福縣翔鸞鄉應福里人系出吳將軍瑜八世祖廣

闕

闕

居石門之田西魯祖文奇祖仲海父大本以儒起家

贈奉議郎妣安人羅氏君自幼志趨異羣兒八歲出語

驚人母傾笥篋質經史資其學未冠率四弟肄業後皆有立以左迪功郎主臨安府監官縣簿戶部侍詠恃勢強傲而吏才實過人兼行府事僚屬無可意日被推辱檄君領軍資庫君悉心營職詠喜待遇獨厚二十四年敕差省試別院點檢試卷官秩滿用舉者陞用正郎調南雄州教授外艱不赴服闋授象州來賓縣令南荒百家之聚絃誦闐寂君擇地遷廟學於州撥公田養士躬自教導有梁端者遂與計偕俗病不療惟屠牛祭鬼君

力禁止為市藥桂林教以湯劑境內多盜嚴保五關闕

闕盜以不闕 圖圖常空闕 覃恩循闕 文林

郎會詔監司郡守舉屬吏象守唐後人以君政績聞去

為德安府教授國朝宋元憲景文公兄弟鄭毅父內翰

皆邦人以文章魁多士自宣和後莽闕 為盜區庠序

廢壞君至日加葺治增弟子員講授切磋砥士氣復振乙

酉秋試預薦者四皆學職也君送以詩云一網多收泮

水英其後李松齡遂擢第一甲子之大荒君之力也古

郡多人物事蹟而缺圖志君為隕地叢紀深得史氏之體改宣教郎知婺州永康縣轉奉議郎未至丁母憂免喪知贛州雩都縣遷承議郎地廣訟繁君躬自省決咸得其情時郡守常有所需君不應守怒諷部使者易它官捃撫公私一無所撻守悟趣還任淳熙二年莽寇有薄境者君部弓兵合巡尉却之益愧服更加延譽通判邵州轉朝奉郎七年八月癸卯以疾卒於家享年六十一君端實而通明喜論天下事著述規古作恥於蹈襲下

筆滾滾不休雖尺牘亦粲然成文鄉之先進權吏部尚書劉公才邵直敷文閣王公庭珪皆推許之名在甲科未嘗自媒每詣曹視可入闕即注以歸淹留遠宦怡然自得奉身清儉先疇推與諸弟衣食僅給而周急無靳持論常鯁挺至接物則謙和樂道人之善而覆其所短平生無纖毫過失此公論有不可掩者先廬之南有鑑泉澄澈可愛面對鍾嶺環以清溪君卜居其中闢訥齋以燕息間嘗與予言仕宦倘不遇當老於此極山林之樂

而孰謂君官既不達志復不遂也娶鄉里李氏劉氏俱封安人五男長稷今為儒林郎新廣南西路經畧安撫司幹辦公事次拒登仕郎次穉結穡結早夭拒穉亡矣稷與穡俱向學世其家一女適進士劉揖孫男五人壽仁壽祖壽夢壽春一未名孫女三人長適進士曾宏敷次適鄉貢進士劉夢驥一尚幼有文集二十卷初葬邑之永嘉鄉東富嶺慶元三年八月二十五日改葬新喻

縣仁闕鄉城之原銘曰

嗟乎孟覺天之生君謂無意耶何賦之異才而發之以
巍科謂有意耶名位之不高而壽祉之不遐莽蒼蒼兮
難問徒耿耿其長嗟若夫行誼修而表於鄉學術博而
昌其家雖千百年猶未泯竟孰為少孰為多耶

葛先生源墓誌銘

古者賓興之士論定於鄉是以上不失人下無遺才
後世升黜一以程文賢能不皆進愚不肖未必退往往
出於偶然曰此公舉也而鄉評不在焉若乃德行道藝

脩之身信於人雖曰未遇而無智愚大小生則推尊之
沒則追思之是謂鄉評殆與公舉相為權衡然彼猶可
幸得而此不容力致輕重斷可識矣吉為士之鄧林鄉
評所推今有人焉葛先生是已先生諱潑字德源系出
常州祥符間名宦者始登科自是世策高第或至侍從
輔相惟先生高祖詠徙家廬陵曾祖日宣祖敏求考經
俱有文行叔祖遵岷先生敏脩擢元祐三年甲科受知
蘓文忠公黃太史坐上書入黨籍學者宗之先生四歲

而孤又七年母亡依仲父唐州錄叅緯苦學忘寢食手抄書鉅萬無一字行草貫通經子歷代史書端醇詳雅士大夫子弟爭願從胡忠簡公及其羣從號儒先甲族競以書幣延致亦嘗不鄙過予家塾晚即所居講授八邑暨傍郡秀民著錄盈門先生廸以行誼非但章通句解而已後多登第游宦荐春官不論也初錄叅老而貧同產滋流落湖湘妙嫠居先生並迎歸奉養整束脩畢其婚嫁常產闕如也遵岷既無子錄叅為之繼先生亦

謂錄叅鞠育不可忘身主其祭孝友類此郡博士檢賢名
請為直學遷學錄慶元六年四月甲午以疾不起博士
率諸生奠哭盡哀鄉人皆來弔曰鄉先生亡矣享年七
十有五以十二月甲申葬郡西清塘之原娶同郡曾氏
生三男長琳早世次玠季環傳父業玠再預賓貢四女
長適貢士曾友節仲適吳簡卿叔王及及夫改適尹達
前先生十二日而亡季適田逢原孫四人一男祀三女
俱幼所著有草茅卑論三卷祭齋筆語四十卷先生存

心恕而勇於義嘗集本朝死王事者著旌忠錄三卷名
士多為序跋常州族立象大司成次仲之子乾道中來
守廬陵於先生為從兄先生旅謁即退立象代還執手
歎其安恬予自上印綬與先生及歐陽伯威歲講同甲
之會月為貞率之集先生文華有餘凡子小圃草木猿
鶴悉為賦詩語新而事的卷軸盈篋今失良朋能無永
歎玠等乞銘其忍弗從銘曰

脩其天爵席以儒珍昔聞其語今覲其人士無賢愚曰

鄉先生盍祭於社永光榆粉

文忠集卷七十二

欽定四庫全書

文忠集卷七十三

平園續稿三十三

宋周必大撰

墓誌銘三

永州張使君

真

墓誌銘

慶元六年

張氏世為亳州譙縣人使君諱真字叔保曾祖言勅授
本州助教祖宰贈右中散大夫父允蹈朝請大夫直秘
閣贈通奉大夫君天資警敏少年已如老成人事無大

小處之悉有條理秘閣屢欲還政官之君力學好脩必欲進以科第年四十四始從門蔭為迪功郎乾道六年也調賀州臨賀縣主簿旋丁父憂淳熙改元監隆興府豐城縣戶部贍軍酒庫秩滿移衡州耒陽丞用舉主改宣教郎知袁州萍鄉縣年勞轉通直奉議郎十六年覃恩遷承議郎賜服緋銀通判隆興府轉朝奉朝散郎紹熙五年上即位遷朝請郎知永州轉朝請大夫慶元四年至郡六年秋引疾主管台州崇道觀命未至而

卒九月五日也享年七十四妻宜人王氏樞密副使敏
節公庶之孫知開州之道之女前九年卒是生五男履
迪功郎新辰州叙浦縣主簿賁當受致仕恩隨臨觀舉
進士孫男七人長孫仲孫季孫衛孫晉孫同孫永孫女
六人諸子卜以是年十二月丙午葬君吉州廬陵縣高
澤鄉新莊之原宜人墓之左既求行狀於待制楊公又
以銘見屬曰此先君治命也予不敢辭亦不敢欺君初
為酒正適繼敗闕歲課驟登府高其能檄行獄掾改分

寧宰縣經兵火版籍不正冒耕無筭產去虐取君括而正之府下其法於傍邑公私交利武寧民妄訴邑長文罔三十事君究切直之罔來餉謝君怒與之絕為丞時選揖衡掾提刑馬大同嚴而察典獄少可其意有舉子術士被誣殺人而君皆辨其非辜大同怒甚君不為屈俄伴獲正犯者大同與他司交薦改秩仍減磨勘四年萍鄉大邑豪右持吏短長知君強明帖帖畏服乃以餘力增飾學校周給落南仕族以喪歸者戶婚滯訟累政

不能決立為折衷皆心服而去隆興會府司多名臣凡
文書視君籤擬即行其得二千石用列薦也永本名郡
比歲空乏因之蝗旱君劬躬苦節勸分告糴賑饑民以
萬計常平使者疑不實單車按臨反加歎服率朝臣論
奏明年歲稔官府侵還舊觀而君病矣士民日夜祈禱
聞訃往往出涕去萍鄉已星終柩過迎送不絕為守令
得人心如此予既序次其閎闕復以目擊耳聞者付之
當紹興庚午與君同試秋闈見其記問文采俱過人遂

與計偕以是知君之學考秘閣素高誼初寓廬陵食猶未足已能收恤宗族絕甘分少君與兄異同心協力助成父志君尤服其勞異字伯制生以壬寅早為名士朱希真所稱二惠方競爽庚寅秋兄終於廣西常司幹官君獨任家事秘閣喜賓客樂宴遊乃葺園林治食飲客至必請款留凡可娛親不憚勞費秘閣既沒君於親姻益為區處使有常產與人交事賢友仁恭敬周旋得其歡心以是知君之行秘閣守興化也歲常大歛脩荒政

境無流徙城中比屋儒士巨室如葉丞相顯陳正獻公
俊卿龔叅政茂良先已貴重艾軒林光朝號鄉先生著
作劉夙第朔皆殊科有盛名為一國之所慕秘閣政事
必咨利害必謀諸公樂告以善治譽轉聞璽書召還雖
辭疾猶貼職知常德府咸謂過庭密贊為多予於是又
知君之才惜乎從仕已晚年除歲遷抱能未施識與不
識莫不歎息焉銘曰

養志事親服勞從兄孰能居家孝弟兼申寬則民慢猛

則民畏孰能蒞官豈弟交濟敬宗非難收族其難誰不
虛拘實遺以安泛愛或易親仁為貴誰不憚煩兩極其
至美具善并身沒名存有子有孫方大其門我銘非公
言則非讐高谷深陵斯文不壞

新淦劉德萬

人傑

墓誌銘

嘉泰元年追述

乾道九年余被命起家守富沙將趨朝道過臨江新淦
有劉君德萬來訪予講賓主始相見禮已出書袖間累
數百言陳古聖賢出處之誼孔子孟子於其君大夫辭

命或應或不應者假設為問以質余固甚壯其意而愛其文詞也自是不復見德萬然心獨識之不忘今吏部侍郎程公往年使江西求門下士遂以德萬對程公於許子人不假借間以書稱德萬甚善與論經史今者即往復不已及於鄉部公事宜奈何即不答余於是始得其行焉今其兄德從以狀來乞銘曰噫昌遇之弟死矣弟力學事親孝於伯仲輯睦無遺闕與人交用情聞鄉鄰親戚卒葬嫁娶具有缺不以貧為解且曰吾弟生不

能自振白幸及識公猶可以不腐敢請勿辭余既竊悲
之又益知德萬之行與其言果不謬余於德萬未之先
施也辱惠見又辱切磋告之而德萬迺年止四十嘗一
上春官不第其父兄不勝哀焉而欲托余言以見世以
余所覩及程公稱道校德從所為狀其務自立亦誠有
應書者然則皆宜銘遂次其世系年月而銘之德萬世
為永靜東光人其先自寺丞君誥始仕曾祖安上贈武
經大夫祖履武節大夫泗州兵馬鈐轄父迪從義郎前

辰州辰溪縣尉建炎間金南侵泗守佐下皆遁去鈴轄
斬以徇攻急城陷遂遇害縣尉走匿亂兵間訖獲遺骸
負之渡江葬建康稍南徙其家淦邑生四子三曰人傑
者德萬也娶鄒氏卒再娶王牒趙氏一子俱七歲以淳
熙二年四月丙辰卒其年十有二月某日附葬於邑城
南之先塋銘曰

祖也死以徇其君父也亡以殉其親宜嗣有人而縕不
伸嗚呼尚永閔其身

通直郎彭君

叔度

墓誌銘

紹興庚午秋吉之士五十七人賓於王今五十有二年
存者纔六人某與寶文閣待制楊公萬里通直郎彭君
叔度承事郎戴君叔闕蒲圻丞歐陽君叢起興國丞曾
君昌齡也年踰七望八者自戴而上四人約祿居里方
謀為履道之集今年五月乃聞彭君以疾卒悼念未已
而諸孤携里人曲江曾天若狀來請銘其何能辭君字
秀量吉水縣人曾祖昇祖并父儒林郎洪觀察推官浩

然贈奉議大夫妣孺人劉氏生二子俱負雋聲長叔亮
字季明以丁卯魁鄉舉癸酉再薦季量幼穎悟八歲能
屬文連四季預貢聲隱萬人上淳熙乙未特恩授迪功
郎靜江府靈川尉兼主簿府帥王卿月有文武才深知
君尉以縣事復攝獄掾延譽於漕憲交薦之秩滿調融
州司法叅軍高宗慶壽恩職郎用前舉主循從政郎郡
守趙不迂亦薦之轉南康軍建昌縣丞守曾集咨其請
命行都昌令今上覃恩循文林郎遂不待年告老改通

直郎致仕俄賜服緋銀其卒年七十有四君醇實節重
待族黨和而敬雖接童稚無倨色臨事則剛方有守每
以已所不欲勿施於人誨子孫至於溫良恭敬遜當躬
行之望而知其為君子人也晚嗜書不倦臨終神色湛
然其所養可知矣娶曾氏黃氏俱贈孺人今孺人劉氏
五男良能良嗣良顯良矩良友皆世其業良嗣前闕年
死四女適李公裔劉興賢項九德胡壽卿孫男十四人
嵩崱峻崇嶽餘未名女九人曾孫二人有文集三十餘

卷詩書意原二十卷以十二月甲申葬於邑之永昌鄉塘原口距察推墓五十步今年實嘉泰元年辛酉銘曰如玉斯溫如水斯清熒熒其文舒舒其成仕再轉而承年七十而羸惟不極於亨以貽後之人

朝議大夫直秘閣廣西轉運判官彭府君

漢老

墓誌銘

嘉泰元年八月

故戶部郎中總領湖廣江西京西財賦彭公厚德深仁令聞廣譽達於公卿信於鄉黨施及子孫多顯官克家

遂為廬陵盛族轉運府君實戶部之季子才猷望實是似先人守藩察州方嚮於用奄其亡矣士大夫為國惜才者總總也諸孤卜以嘉泰元年十月丁酉葬本縣高澤鄉大岡之原持寶文閣待制誠齋楊公所狀行實來請銘予早升戶部之堂退從兄弟遊久矣其何可辭府君諱漢老字皓闕五世祖自金陵徙家吉州廬陵縣曾祖士忠贈朝請郎祖衍左朝奉郎累贈正議大夫戶部諱合終朝請大夫累贈特進妣永寧郡夫人劉氏同安

郡夫人李氏新定郡夫人曾氏武陵郡夫人黃氏府君
幼長於詩紹興末門蔭將仕郎起家迪功郎主簿誼州
司立寨秩滿丁外艱隆興六年服除循脩職郎監潭州
南嶽廟調沅州司理叅軍獄重囚指病如股君請紓其
禁守不可君力爭竟免瘐死諸司以寬厚廉敏薦者十
三人乾道七年由從政郎改宣教郎知常德府武陵縣
每歲茶商四集適惡少無賴相鬪毆民皆驚避守欲調
兵捕治君請單車以禍福曉之家帖帖聽命淳熙元年

轉通直郎大將邵宏淵

闕

居據官池數十頃馬氏子冒

占民產君皆正之田鄰交訟諭之以相友助之意悔悟
無所爭右選祝氏妾官族女為分俸嫁之臺府以名聞
籍記中書去為江西提刑司幹辦公事贛水暴漲浮梁
斷壞西昌民闌得某舟提刑適行州事將以盜論武吏
翟某代久不得去君並與為地來謝則拒之留丞相以
侍從守贛率其長薦於朝郊恩賜七品服注湖廣等路
總領所幹辦公事六路綱運繁夥愆期折閱拘繫日

多君闕郡守吝財削糜費執家挾援相轉易案胥督賊

謝舟人利侵欺四弊弗問獨治所差官吏可乎時權戶

部侍郎蔡公戡資政殿大學士趙公彥逾繼主餉道深

然其言悉疏理之交章薦舉予政路方議進擬而君力

求奉祠十二年主管成都府玉局觀由奉議郎歷轉朝

請郎光宗登極遷闕奉大夫擢知均州兼管內安撫陞

對論三朝事補諸軍門額核寄椿金穀嚴官券增損尋

皆報可州數易守倉庫一空君脩政事而用足乃以餘

力興崇序庠民俗死則焚尸或蔽而不墓君出私財助其棺斂擇塲圃為兆域浸革舊習境接金州與敵境天牙相入有寇鄰者教授山中用意叵測號寇先生名動南北朝廷常諭沿邊伺察之君動息必知卒無能為嘗請增戍兵脩器械豐儲積補常平事多施行郡縣官闕月茶券半之守獨支緡錢君以十率上下悅服境內麥價低平從宦者例商販年利一切禁絕治郡慈惠固闕

安靜見於帥漕之奏年勞轉朝散朝請大夫今上覃恩

進奉直大夫慶元元年入闕稱旨知常德府兼提舉本
府澧辰沅靖州兵馬盜賊公事大禮封廬陵縣開國男
食邑三百戶轉朝議大夫豪民劉庚被刳指其悍僕嗾
等輩為之獄官考掠誣伏法當誅君聚問疑焉諭令審
鞠旋得正盜臺府互致月饋悉貯別帑學宮弊陋營造
一新畢文簡公遠裔流落娶居二女未嫁並為嫁遣凡
土木資送之費一出所貯地控五溪兵籍三千僅存十
一君增至五百人詔減磨勘二年歲儉民饑常平使者

不在君徑發廩拯濟或以比汲黯俄轉中散大夫監司
復奏治最除廣東轉運判官入境風采凜然就易西路
至德慶府意若微疾亟命納祿假寐而逝實六年二月
九日也享年六十有七時除直秘閣致仕贊書有曰制
行無虧居官可記又曰以疾而休朕固深惜嗚呼使天
假之齡其進用詎止是耶君娶同郡曾氏前閩漕仔之
從孫先十年卒贈令人四男堯俞早世去疾嘗舉於鄉
今為文林郎前監廣州市舶庫去恭迪功郎前靜江府

司戶叅軍去非通仕郎三女長適通直郎新知隆興府
武寧縣歐陽侯次適故奉議郎知撫州臨川縣劉德禮
季天孫男六人舜牧舜元舜愷舜申舜缺舜庸女八人
長適故儒林郎鄂州教授趙師共餘未行君碩大溫恭
孝友慈愛二女弟家居擇從仕知名者歸之親族婚姻
鄉鄰喪葬或不時者悉力周給行實如此是可銘曰
安靜者山居以持身疏通者川出而治民故其洵洵一
鄉推重而或肅肅百吏振悚武當武陵節鎮之雄春雨

秋霜疊奏顯庸番禺桂林統地萬里嶺稜海氛庶其一
洗卿階既濟英蕩交馳周牡西徂衛幕東歸有幽斯宮
筮協龜卜利其嗣人宜爾戩穀

率齋王居士

伯芻

墓誌銘

嘉泰元年

嘉泰辛酉八月庚辰多聞之友王駒父久病不起卜地
吉州廬陵縣西十里儒行鄉城上之原用十月丁酉掩
壙其孤暨門人鄉貢進士許陵來請銘予識君三十年
晚幸切鄰把酒論文無虛日自君卧疾每憂之今銘其

墓能勿悲乎君諱伯芻駒父字也世居琅琊臨沂文
正公遠族曾祖炫治平四年登第兩為發運司屬官遂
家真州仕至太常寺協律郎嘗與黃太史庭堅唱酬贈
朝奉郎祖箱早世娶臨江新喻蕭氏父侃力學有氣節
與鄉人吳丞相敏厚從吳謫涪居柳欲奏以門客恩辭
不受建炎己酉侍母避地新喻廬陵終焉駒父生以紹
興壬子母顏氏繼母陳氏幼記問過人既長博洽工文
詞一再游場屋不利即棄去喜藏書六經諸史日夜校

讐箋訓古今文集徧覽成誦太玄潛虛傍及釋典亦皆
淹貫凡前賢世系出處必推見本末家故負藉售文教
學養生送死闕未嘗一介取諸人性恥詭隨不妄交

遊郡縣官聞其名待以上客自縣學教諭升州學錄能
舉其職鄉先生楊待制萬里目為淮海文士教官楊愿
詩人也贈絕句云忽得君詩愜人意陶家風到北窓時
謝尚書諤遣友人胡宓求琢磨指南湯舍人邦彥推其
文采議論為當世之傑劉袁州清之亦謂文字高雅使

後生知所嚮可望一變至於道其為諸公推重如此自
號率齋雅好著述時事可紀每加撰次其叙淳熙初茶
寇起湖北擾江西有史法禠著十卷詩詞十卷五代詠
史詩二百篇雜記一編享年七十娶彭氏生二子長及
嚮學前卒季源世其業一女適葛環二孫象先元齡銘
曰

君之學問經史百家君之詞章夏雲春華負志氣之軼
羣胡聘幣之弗加天耶人耶吾不得而知也徒懷舊而

咨嗟

廸功郎辰州叙浦張主簿履墓誌銘

嘉泰二年

隆興癸未夏予解掖垣奉祠歸廬陵之永和鎮間入城
諸寓公往往忘年相禮而常德史君張公又加禮焉家
有會芳堂見遠樓勝事亭率為款留見其仲子永州史
君養志無遺接客謙敬退竊咨美常德既卒叅政龔公
茂良為之銘請予書丹予於永州年相次故尤相善見
其長子主簿君之事父如永州之事常德也盡斥婦財

竭歲入治園林亭榭號曰腴莊日置酒延客娛樂其親
永州卽世君復誌歲月甫經祥祭君又不起諸弟若子
以友人朱岑狀來謁銘昔韓退之謂未四十年哭北平
王祖子孫三世今卽相類予既慨嘆重有三恨君嗜書
博記下筆過人及試有司輒不利一也通敏之才遇事
風生凡吉運米下江淮綱官競求客舟避官舟郡君或
強以委君君心計強明不失龠合而四家未賞祿亦弗
及二也常德年八十永州亦七十四君纔五十三耳三

也凡邦人均有恨豈獨子乎按張氏世家亳社常德因
宦游居吉州遂為盛族君名履字坦夫贈中散大夫諱
允蹈朝奉大夫知永州諱奭其世代也慶元丁巳蔭補
將仕郎以迪功郎知辰州叙浦簿此即闕也嘉泰辛酉
十二月己亥死之日也明年三月壬申窆之期也美化
村土原卜之地也娶茶園王氏登仕郎秉國之女前沒
曰長孫仲孫季孫其三子也銘曰

吁嗟乎吾坦夫才無不兼取何蘆祿未及霑身寢苦如

火欲炎焰先燭如車將旌旒乃瞻穴臨山崦嘆良殲銘
申滯淹慰幽潛吁嗟乎吾坦夫

承直郎尚甥

振藻

墓誌銘

嘉泰二年

甥姓尚氏名振藻字景華相州人也曾祖朝奉郎諱
贈大中大夫祖朝請大夫國子祭酒諱佐均通經博聞
被遇徽廟為時醇儒贈中大夫考承議郎諱大伸嘗簽
書威武軍節度使判官廳公事兼西外宗正簿改左武
昌軍氣槩不羣博洽有父風母孺人周氏子之兄女也

甥幼警悟磊落父母鍾愛稍長知嚮闕才具恢闊輕財

重義赴人之急甚於己私予在政府奏以官監筠州新

昌縣酒稅秩滿為蘄都大監轄蘄口鎮倉庫兼兵馬烟

火公事薄征戢吏商賈四集聽訟決事舉得其平時捐

奉周貧民凡舟車往來及出入廛市者交口譽之州上

於諸司諸司列薦未報嘉泰改元五月辛酉方飯客暴

得疾卒家無餘資郡僚貸錢買棺以斂年四十八階自

迪功郎以賞循直郎娶劉氏男希呂苦學早世希尹方

喻志學一女尚幼其兄宣教郎新知桂陽軍臨武縣事
振英為卜地吉州廬陵縣膏澤鄉石窟之原葬用二年
六月甲申前期以友人鄉貢進士胡渙狀來請銘銘曰
材良器工成此輪輿馭之以氣可馳可驅未行九折僨
於中塗天實為之已矣嗚呼

文忠集卷七十三